

明史稿

明史稿

明史藁

志第四

光祿大夫

經筵講官明史總裁戶部尚書加七級

臣

王鴻緒奉

敕編撰

五行一

水

五行之說本於箕子其配之以五事而以某事之應當之則自漢儒言災異始然董仲舒劉向歆父子以春秋合於書指已然之事爲徵不免牽合附會互相牴牾晁孟李尋翼奉京房之徒參以他說遙揣未然之事則又不免鑿空荒唐難以据依於是歐陽修力詆五行傳之謬書事而不言應曰此春秋之旨也宋元之史悉仿唐書條目稍增皆削徵驗不載然歐陽氏特不言所驗而未嘗不引所占夫驗之於占猶影響

之於形聲也言占而必及於驗所以昭其戒言占而不及於驗所以絕其誣二說竝存不可偏廢惟但斥以爲誣而盡去其說則前代帝王因日食星變風雷水旱之災使羣臣上書指某事之失以爲修省者亦皆可以不必矣豈遇災知懼之意哉是故有是占而的然有是驗者并書其驗可也有是占而未嘗的然有是驗者但存其占可也炎漢諸儒稽古過篤憑理以談天人近於尼而未化矣然自歐陽氏之說行而後世之言災異者愈疎記徵應者亦罕第可據實錄所書及野史之不妥者存之以備參考而已宋書創立符瑞不可以爲典訓齊金二史更五行曰災祥未爲無見顧災多而祥少且志祥亦近於導諛取準唐書削而不錄其大者載於本紀小

者不足存也宋史則以甘露醴泉靈芝嘉禾等一切謂之反
而附之災變胥祥之列則屬矯之過者審如是則易何以
演圖書書何以言鳳凰詩何以咏麟趾騶虞箕子亦不宜復
及於休徵也特不可藉是以獻媚於君耳自漢至唐五行之
序參差不合宋史宗洪範者也故從之

按五行傳簡宗廟不禱祠廢祭祀逆天時則水不潤下又曰
聽之不聰是謂不謀厥咎急厥罰恒寒厥極貧時則有鼓妖
時則有豕禍時則有耳病時則有雷電霜雪雨雹黑眚黑祥
惟火沴水宋史凡水潦河清醴泉大雪隕霜雨雹雷震魚孽
蝗蝻豕禍黑眚水變水鬪昏霧日無光白虹龍蛇見馬異一
產三男疾疫天鳴隕石皆屬之水今削醴泉附日無光於天

文之日變餘從其例

水潦洪武元年六月江西新州蛟出江水入城高八尺人多溺死三年六月溧水縣江溢漂民居四年七月南寧府江溢壞城垣衢州府龍游縣大雨水漂民廬男女溺死五年八月嵯縣義烏餘杭山谷水湧人民溺死甚衆六年二月崇明縣爲潮所沒七月嘉定府龍游縣洋雅二江漲翼日南溪縣江漲俱漂公廨民居七年八月高密縣膠河溢傷禾八年七月淮安北平河南山東大水十二月直隸蘇州湖州嘉興松江常州太平寧國浙江杭州俱水九年京師大水百官乘船以朝七月湖廣山東大水十年六月永平灤漆二水沒民廬舍七月北平八府大水壞城垣十一年七月蘇松揚台四府海

溢人多溺死十二年五月青田山水沒縣治十三年十一月
崇明潮決沙岬人畜多溺死是歲河南河決十五年七月河
溢滎澤陽武十七年八月河決開封橫流數十里十月河南
北平俱水十八年八月河南又水二十三年七月河南河決
漂沒民居二十四年十月北平河間二府水二十五年正月
河決陽武開封州縣十一俱水二十六年十一月青兗濟寧
三府水二十七年三月寧陽汶河決二十八年八月德州大
水壞城垣三十年八月河決開封三面皆水犯倉庫而止永
樂元年三月京師雨水壞西南隅城五十餘丈五月章丘漂
河決岬傷稼南海番禺潮溢八月安丘縣紅河決二年六月
蘇松嘉湖四府俱水七月湖廣江西水九月河決開封壞城

三年三月溫縣水決隄四十餘丈濟滂二水溢八月杭州屬
縣多水淹男婦四百餘人七年五月安陸州江溢決渲馬灘
圩畔千六百餘丈六月壽州水決城是歲秦興江畔淪於江
者三千九百餘丈八年五月平度州濰水及浮糠河決浸百
十三所十二月汴河決壞城九年正月高郵甓社等九湖及
天長諸水暴漲六月揚州屬州縣五江潮漲四日漂人畜甚
衆八月漳衛二水決隄淹田九月雷州颶風暴雨淹遂溪海
康壤田禾八百餘頃溺死千六百餘人十年七月盧溝水漲
壞橋及隄畔溺死人畜保定縣決河畔五十四處十一月吳
橋東光興濟交河天津決隄傷稼十二月安州雨水決直亭
等河口八十九處十二年十月臨晉涑河逆流決姚暹渠堰

流入硝池淹沒民田將及鹽池崇明潮暴至漂廬舍五千八百餘家十三年六月北畿河南山東霍雨水溢壞廬舍沒田禾臨清尤甚淫漳二水漂磁州民舍十四年夏南昌諸府連月霍雨江漲壞民廬舍七月開封州縣十四河決隄岍永平灤漆二河溢壞民田禾福寧延平邵武廣信饒州衢州金華七府俱大雨溪水暴漲壞城垣房舍溺死人畜甚衆遼東遼河代子河水溢浸沒城垣屯堡十八年夏秋仁和海寧潮湧堤淪入海者千五百餘丈二十年五月廣東諸府潮溢溺死三百六十餘人夏秋霍雨河南北及鳳陽河溢州縣二十四二十一年五月峨眉驟雨溪水漲溺死百三十人二十二年七月黃巖潮溢溺死八百人洪熙元年六月通州武清固安

鄆縣決河西務白浮宋家口堤岍臨漳漳溢二河決堤岍二十四真定滹沱河大溢沒三州五縣田七月容城白溝河漲傷苗稼渾河決盧溝橋東狼窩口順天河間保定灤州俱水宣德元年六七月連雨黃汝二水溢渰開封十州縣及南陽汝州河南嵩縣江水大漲襄陽穀城均州鄖縣緣江民居漂沒者半三年五月邵陽武岡湘鄉暴風雨七晝夜山水驟長平地高六尺永寧衛大水壞城四百丈六月渾河水溢決盧溝河堤百餘丈七月北畿七府俱水六年六月渾河溢決徐家等口順天保定真定河間州縣二十九俱水七月河決開封八縣七年六月太原大雨河汾並溢傷稼八年六月江西霍雨瀕江八府江漲漂沒民田七月復連雨溺死男婦無算

九年正月沁鄉沁水漲決馬曲灣經獲嘉新鄉平地成河五月寧海縣潮決徙地百七十餘頃六月渾河決東岍自狼河口至小屯廠順天順德河間俱水七月遼東大雨水正統元年閏六月順天真定保定濟南開封彰德六府俱大水二年鳳陽淮安揚州諸府徐和滁諸州河南開封四五月連雨河淮泛漲漂居民禾稼九月河決陽武原武滎澤湖廣沿江六縣大水決江堤三年陽武河決武陟沁決廣平順德漳決通州白河溢四年五月京師大水壞宮舍民居三千三百九十區順天真定保定三府州縣及開封衛輝彰德三府俱大雨水七月漳沱沁漳三水俱決壞饒陽獻縣衛輝彰德堤岍八月白溝渾河二水溢決保定安州堤蘇常鎮三府及江寧五

縣俱水溺死男婦甚衆九月滹沱復決深州淤百餘里五年
五月至七月江西四府霖雨江溢河南三府霖雨河溢八月
潮決蕭山海塘六年五月泗州水溢丈餘漂廬舍七月水決
武清鄆縣堤二十二處八月寧夏久雨水泛壞屯堡墩臺甚
衆八年六月渾河決固安八月台州松門海門海潮泛溢壞
城郭官亭民舍軍器九年七月揚子江沙洲潮水溢漲高丈
五六尺溺男女千餘人閏七月北畿七府及應天濟南岳州
嘉興湖州台州俱大水河南山水灌衛河沒衛渾開封懷慶
彰德民舍壞衛所城十年三月洪洞霖雨汾水隄決移置普
潤驛以遠其害夏福建大雨水壞延平府衛城沒三縣田禾
民舍人畜漂流無算河南州縣十四俱大水七月延安衛大

雨水壞護城河隄九月廣東衛所十三大雨水十月河決山
東金龍口陽穀堤十一年六月渾河溢固安北畿三府南畿
八府浙江三府河南二府俱連月大雨水是歲徐州南陽太
原兗州武昌亦俱大水十二年春贛州臨江大雨水五月吉
安江漲滄田十三年六月大名河決滄二百餘里壞廬舍二
萬區死者千餘人河南濟南青兗東昌亦俱河決七月寧夏
大水河決漢唐二壩河南八樹口決漫曹濮二州抵東昌壞
沙灣等堤十四年四月吉安南昌臨江俱水壞壇廟廨舍景
泰元年七月應天大水沒七縣民廬三年六月大雨浹旬河
決沙灣白馬頭七十餘丈八月徐州濟寧間平地水高一丈
民居盡圯南畿河南山東陝西俱大水四年春夏河連決沙

灣五年六月揚州大風雨潮決高郵寶應隄岍七月蘇松淮
揚廬鳳六府大水八月東兗濟三府大雨水河漲滄田六年
六月開封保定俱大水閏六月順天大雨水灤河泛溢壞城
垣民舍河間永平水患尤甚武昌諸府江溢傷稼七年六月
河決開封河南彰德田廬淹沒浙西夏雨三月北畿山東秋
雨兩月俱大水天順元年夏淮安徐州懷慶衛輝俱大雨水
河決三年六月穀城景陵襄水湧泛傷稼四年夏湖北八府
江漲淹沒麥禾北畿及開封汝寧大水五年七月河決開封
土城築磚城禦之越三日磚城亦潰水深丈餘周王後宮及
官民乘筏以避城中死者無算襄城水決城門溺死甚衆崇
明嘉定崑山上海海潮衝決溺死萬二千五百餘人浙江亦

大水六年七月淮安大水潮溢溺死鹽丁千三百餘人七年
七月密雲大雨山水驟漲軍器文卷房屋俱沒成化三年六
月江夏水決江口隄圯迄漢陽長八百五十丈有奇五年湖
廣大水山西汾水傷稼六年六月北畿五府大水七年夏山
東浙江水九月大風雨山東七府及浙江杭嘉湖紹四府俱
海溢渰田宅人畜無算九年六月畿南五府及懷慶俱大雨
水八月山東大水十一年五月湖廣八府俱水十二年八月
浙江風潮大雨淮鳳揚徐亦俱大水十三年二月甲戌安
慶大雪次日大雨江水暴漲閏二月河南大水九月淮水溢
壞淮安州縣官舍民屋渰没人畜甚衆十四年四月襄陽江
溢壞城郭五月陝州大水人多渰死七月北畿山東水九月

河決開封護城隄五十丈十八年七月昌平大水決居庸關
水門四十九城垣鋪樓墩臺一百二八月衛漳滹沱竝溢自
清平抵天津弘治二年五月河決開封黃沙岡抵紅船灣凡
六處入沁河所經州縣多災省城尤甚七月順永河保四府
州縣大水八月盧溝河堤壞七年七月蘇常鎮三府潮溢平
地水五尺沿江者一丈民多溺死九年六月山陰蕭山大雨
山崩水湧溺死三百餘人十四年五月貴池水漲蛟出渰死
二百六十餘人旁邑十二皆大雨水七月廉州及靈山海漲
渰死百五十餘人閏七月瓊山颶風潮溢平地水高七尺八
月池寧安太四府大水蛟出漂流房屋十五年七月南京大
風雨江水泛溢湖水入城五尺餘十七年六月廬山大風雨

平地水丈餘溺死星子德安民及漂沒廬舍甚衆正德元年
六月陝西徽州大雨河溢漂沒居民孳畜二年六月固原驟
雨河漲平地水高四尺人畜溺死三年九月延綏慶陽大水
五年九月寧安太三府大水溺死二萬三千餘人十一月蘇
松常三府水六年六月汜水暴漲溺死百七十六人毀城垣
百七十餘堵十二年順天河間保定真定大雨水鳳陽蘇松
常鎮嘉湖諸府皆大水淮安新舊城駕舟而行居民半栖城
上荆襄江水亦大漲十五年五月江西大水嘉靖元年七月
南京暴風雨江水湧溢郊社陵寢宮闕城垣吻脊欄楯皆壞
拔樹萬餘株江船漂沒甚衆廬鳳淮揚四府同日大風雨雹
河水泛漲溺死人畜無算二年七月揚及徐州復大水夏秋